

Terugblik carnaval 1998

Ut begos allemaol mit ut mökkelaaje de wèk vur de prinseproclamatie. De minse daoachte echt dat wej un wèk te vroeg ware en minse die dun mök ien dun hof krege, wiere soms spontaan gebeld dur minse buute Oeldere um ze te felisitiere mit ur uutverkiezing. De mök wier as urste ien dun hof gezet bej naor latter bleek ozze echte neje prins Math Drabbels. En dat was ok d'n ennigste den dat van te vurre wis. Daornao wier de mök bej Robert en Corin Michels ien d'n hof gezet En belandde hej vervolges bej Marco de Mulder, de familie Clephas en John Willems. Szondagsmerges 11 januari verhuusde ie tenslotte vur de lèste kier. Dit kier kwaam ie terecht op ut durpsplein mit nog steeds de tekst: Prins mit Pit, wat ok vort te lèze was op de ienvalsweg van Oeldere. Oeldere is enne kern mit pit en dus hebbe wej ok enne prins mit pit. Mar eigeluk hebbe wej den altied al gehad. Ien os jubileumjaor han wej ien ieder geval enne prins mit pit, mar den hiel ut op de prinseproclamatie vur gezien. Same mit zien prinses Angelique smheet ie nog urst mit lege taartdoëze um vervolges afgevoerd te werre ien ut ziekenhuusbed van de APK. Onder ut aftreje van ozze prins Marco I was de mökkestal moj vol geloëpe en ut uitkomme van ozze neje prins gebeurde dan ok vur enne volle zaal. Ut podium laag dit jaor vol mit ballonne en midde ien die ballonne len de 6 Lindeprinsen te pitte. Dun achterkant van ut podium was afgemakt mit de Oelderse duuk van de fanfaar en ien ut midde stont enne groëte pit. Uut dizze pit kwaam os prinses Wilma tevurschien en tegeliekertied sprong Math Drabbels as neje prins uut de ballonne nao un verhaal wat drejde um ut gesjouw mit de mök en ovver Oeldere, enne kern mit pit.

Toen de Kelderband Math as prins uut de ballonne zaag komme speulde zej metiën ut nummer wat ze normaal blaoze as ze dur mit stoppe. Mar ja dat is nog altied bèter as dat ze begonne ware mit de Krèjemars.

De Oelderse jeugd haaj ut op dat moment biëstig druk um al die ballonne kapot te make mar toen ze daor ienmaol mit klaor ware luusterde ze ok allemaol andachtig naor ut uitkomme van os neje jeugdprinses, wat hiëlemaol drejde um ut plat praote.

Vrejdags op de leggere schol, han de kiender wer gestemd op 3 kandidate nameluk Sanne Wennekers, Tom Loonen en Bart Jenneskens. Dees 3 wiere op de schouwers van de groëte raod naor binne gedrage. Alle 3 han ze al un gediëlte van ut prinse, vorste en narrepak an. Ge kost dus nie zien wie dat now prins, vorst of nar was of zeuj werre. Alle 3 ginge ze daornao ien de buutton en nao ut vertelle van enne mop en ut beantwoorde van wat vraoge ien ut plat, vond ozze prins Math I dat ze alle 3 èvegoed plat praotte en dus besloot vorst Wout um dan toch mar dengene prins te make den de meste stemme haaj. En dat was Sanne Wennekers die mit ut narrepak nog an veurop ging ien d'n urste polonaise. Gevolgd dur vorst Tom Loonen en nar Bart Jenneskens. Den urste polonaise van os neje jeugdprinses Sanne I wier metiën vastgeled dur de minse van TV 8 die toevallig ien Oeldere ware um de kieker van d'n dag te filme. Wie dat now was wiët ik nie, mar ut verrassingspakket bleef ien ieder geval ien Oeldere en uut dees doës krope Ton en Wies Jenneskens names de buurt "Rondum de Mökkestal" as neej boerebrudspaar van 1998 naor buute. Onder ien de soos was d'r nog en gezellig jeugdbal en 'saoves smieke de eier goed bej ozze neje prins an de Rosakker.

Umdat de jubileum JVV aovend ien november nie dur was kunne gaon was dizze JVV aovend op 20 jannewarie toch nog un bitje angeklejd as enne jubileum JVV aovend.

Koffie mit vlaai binnengebraocht dur de raod van 11 ien enne polonaise en meziek van Nabbe Sef is iets wat we nie ieder jaor hebbe.

Ok dit jaor was ut op de JVV aovend wer moj vol of zeg mar gerust best druk. Vur Piet en Nel van

Eldonk was ut op dizze aovend gedaon mit ut prinselève en nao ziene lèste speech kroop Piet mit Nel onder de lakes um vervolges as ex JVV prins ien ut magazien van ozze mökkestal geparkierd te werre. Ienmiddels stont de groëte pit van de prinseproclamatie bove op de buhn en ging langzaam oop. En as neje JVV prins kwaam Gerrit Houwe uut de pit te vurschien. Tenminste, zoë leek ut. Mar tegeliekertied kroop Thei Hendrix onder de lakes uut, um daornao de lakes uut te gaon dèle as neje JVV prins. Hej miek zich daornao zellufs eige onderscheidinge en as ie achter de microfoon stond of veurop ging ien de polonaise, koste toch zien dat Thei en Mia dukker onder de vère han geloëpe. Natuurluk was dur dizze aovend ok wer un optreje van de Volksdansgroep, keke wej nog iëne kier naor de klène Oelderse dansgarde en kroop Piet van Eldonk nog enne kier mit Nabbe Sef achter de microfoon.

Op zonne aovend gut d'n tied snel en nao nog en liedje ovver vroeger van Gertie Hellegers, Lia Evers en Ans Verblakt was ut bedtied en kosse wej terugkieke op enne zeer goed geslaagde JVV aovend.

Wat volgde was op 31 jannewarie: ut Ald Wieverbal. Dit wier wer enne hiële drukke, gezellige aovend mit muziek van ut orkest Delight. De Oelderse minse han zich wer prachtig verklèd. Ut was dan ok erg moeiluk um zoë te zegge wie dat dur now dit jaor mit de Aldwieverbalwisseltrofee an de haal zeuj gaon. Uuteindeluk ginge de kikkers van de Hoëgeweg dur mit an de haal en was ut Pieter Thiele den as deurwaarder bej de iënlinge dun urste pries ien de wacht slèpte. Natuurluk was d'r ok wer ut parsvleis, de kôje en al dat ètbaar grei uut de pries, de vlaaie en de slagroëmspuite. En zondagssmerges han diegene die de Linde op mosse ruume enne zwaore dobber. Mar ja, ozze vurzitter zet altied: 'hoe smèriger de zaal, hoe gezelliger ut was' en daor zit wel wat ien.

Ienmiddels was de carnavalskrant ok wer verrig en verkocht en was ut op zondag 15 fibbrewarie tied vur de prinsereceptie. Mit dit jaor natuurluk naodrukkeluk anwezig de fanfaar, de Kelderband en vural de kameraoj van Math en Wilma. As un stel paoters zette zej mit eur vieze pletjes dun hiële mökkestal op ziene kop.

Mar ok de APK, de Oelderse veriëninge en de families van Math, Wilma, jeugdprinses Sanne, jeugdvorst Tom en jeugdnar Bart ware dur natuurluk bej. Truus en Thei Wenekers stonte dizze middag is enne kier veur, ien plats van achter d'n tap same mit dochter Sanne ien de rej. Of ut dur wat mit te make het wiët ik nie, mar d'n umzet was ien ieder geval wel höher as andere jaore.

Op ut moment dat prins Math I zien prinseproclamatie ovverhandigd kreeg, han wej nog en verrassing ien petto vur Math Nelissen. Dur ware nameluk enne hoëp ald prinse die mit hun proclamatie de zaal ien liepe en op en rej vur de buhn ginge staon, as en sort ode aan Math Nelissen, den zien lèste proclamatie gemakt haaj vur ziene naamgenoot.

Zoë han de minse de gelegenheid um dees proclamaties nog es enne kier goed te bekieke en un applaus vur Math Nelisse was dan ok zeker op zien plats. Hierbej kreeg hej ok nog en onderscheiding van de vorsteraod vur zien veule verdienste vur os veriëninge ien al die jaore. Nao afloëp van dees goed bezochte gezellige receptie makte joekskapel Göt Net uut Venroy de middag vol.

Dit jaor begos de vastelaovend vur un paar van os vur d'n urste kier op donderdagaovend mit un bezuuk an de carnavalsaovend van de Scouting ien ozze mökkestal. Daags daornao op vreedagmiddag was dur wer d'n optocht, mit moj wèr, vanaf de leggere schol via jeugdprinses Sanne naor ozze mökkestal vur ut carnavalsbal van de leggere schol.

Op zaoterdagmiddag zaat ut serieuze werk d'r an te komme en braochte wej un bezuuk an de prinseninstallatie op ut Gemèntehuus waor wej un bitje te laat ankwame. Mar dit was nie os schuld. Op zaoterdagaovend han wej wer un schon vastelaovesmis mit medewerking van de Kelderband. Ien

zien slotwoord stôkte ozze vorst 11 kerskes an op unne goeje afloëp van carnaval 1998, kerskes die ien die daag daornao nog un paar kier terug zun komme. Nao de mis was dur dit jaor vlaai van de Kelderband ien d'n Terp. En ge kunt zegge wat ge wilt, dat smikt zeker nie slechter.

Mit de vlaai nog tusse de tand ginge wej daornao wer op bezuuk bej pastoër en Jet. Vur ut urst haaj pastoër zich 2 obers angeschafft umdat ut um zelluf en Jet allemaol te veul af wier. Onherkenbaar oberde zej netjes d'n hiële aovend. En pas op ut end van d'n aovend ginge de mutskes af en kwame Wil en Nel Willems as de neje pastorale werkers van Oeldere tevurschien.

Bej pastoër ging ut dur al metiën flink tiggengan. Dur wier enne hoëp gepraot en metiën opgeschreve. Nim now bejvurbeeld ozze vuzitter den verkondigde daor is efkus dat ie op aswoensdag best gèr wel es enne kier gewasse zeuj wille werre dur de vrollie van de raod. Dat wier natuurluk metiën vastgelet mar hierovver straks ien dit verslag mier. Nao pastoër dit jaor enne fijne bodywarmer te hebbe gegève um ien d'n hof an te trekke, was ut laat zat en volgde enne rustige aovend ien d'n Terp.

En dat was vur ozze prins ok mar goed ok, want Math en Wilma wier genne lange nacht gegund. 'sZondagsmerges um 7 uur stonte nameluk de collega's van de Kelderband op de stoep. Compleet mit brudjes, beleg, alles dur op en dur an. Mar ok mit ut allerbelangriekste, un moje serenade die dur vur zeurgde dat de familie Drabbels wel wakker mos werre.

Un paar uurkes latter stont de carnavalswage vur de deur op de Rosakker en zaat ut prinsehuus wer tot op de lèste stoel vol.

'sMiddags volgde de opening van de carnaval ien ozze mökkestal en kwame de kerskes van de vastelaovendmis wer terug.

Jeugdprinses Sanne haaj zich nameluk en dikke kers gekocht die d'n hiële carnaval ien ozze mökkestal mos blieve brande ien de hoop dat vorst Wout eindeluk is enne kier iedere dag op tied zeuj komme. Mar nim mar van mej an dat de hiële Linde anstêke nog nie helpt, laot staon 1 kers.

Jeugdvorst Tom ontpopte zich vanaf de opening as enne echte moppetapper mar ja, hej is dan ok nie vur niks familie van Loonen Thei.

Nao de opening volgde enne drukke middag, mit urst de receptie van ozze jubilaris onderscheidde ien de zilvere spurriemök: Peter Claessens. Speciaal vur Peter haaj ozze vorst en gekleurd strikske mitgebraocht zoëdat ie tenminste vur iëne dag van dat gezanik ovver die gekleurde strikskes af was. Mar Peter haaj un sterk antwoord terug: hej haaj gekleurde strikskes vur de ganse raod van 11.

Vur Peter, Jan Lemmen en de gebroeders Nabben was dur ok nog bezuuk vanuut de vorstenraod, die dees 4 kels en schon onderscheiding opspeldde. Ok vur os kersverse iere-lid Wil was dur un vorsteraodsonderscheiding die netjes op zien clownspak gespeld wier.

Nao dit officiële gediëlte volgde en druk en gezellig kienderbal mit natuurluk de priesuuttreiking van de kleurplate uut de carnavalskrant en enne snoepzak vur de allerklènste ien Oeldere.

Saoves bleek dat ien de soos ok nog niks veranderd was: gewoën druk, gezellig en ontiegeluk hèt. Ien d'n Terp was ut daornao wer gezellig mar eigeluk wel te rustig. Op maondagmerge stont ok iederiën wer vroeg op de biën. Hallef elluf, tied vur ut Snotneuzebal. Ut liekt wel of dat ut ieder jaor drukker wert op ut snotneuzebal en dat zet eigeluk al genoeg.

'sMiddags was dur d'n optocht ien Venraoy gevolgd dur vur de maondag un druk bezocht kienderbal en un gezellig uurke ien de soos.

En dan saoves ut mökkebal, mit wer de kerskes. Dur brandde dur al iën, ut kerske van Sanne, wat dur vur mos zurge dat ozze vorst op tied kwaam. Mar ozze vorst zat dur nog un kerske bej en stokte dat an ien de hoop dat Thei en Truus nie mer zo vroeg an de lèste ronde zun beginne. Verder verliep ut mökkebal mit muziek van Chance, die dur trouwes d'n hiële carnaval zate, zoëas wej ut gehopt han: druk en gezellig. Dinsdag was ut wer boerebrulluft en optochtdag. Mit goej wèr trok dur enne schonne optocht mit latter op dun middag ut vur dun urste kier mit z'n alle boeremoes mit worst ète

ien de mökkestal. En dit is ôs as bestuur en raod van 11 biëstig goed bevalle. En dan is ut zoë dinsdagaovend, ut afsluute van de carnaval ien ozze mökkestal oftewel vur dit jaor gewoën de kerskes uutblaoze. Vur de jeugd ien de soos was ut ok zô goed as afgeloëpe. Um 10 uur saoves toge zej mit z'n alle vanuut de soos naor buute um same vur d'n urste kier apart mit de jeugd, de jeugdmök te verbrande. Wat goed bevalle is ok dankzij de mitwerking van enkele leje van de jeugdfanfaar. En dan kruupt de klok snel naor 24 uur. Ut mökverbrande op d'n drempel, ut afsluute van unne geslaagde vastelaovend.

Mar ok ut afsluute van 21 jaor Gerrit Houwen bej de raod. Natuurluk mosse Gerrit en Els efkus bove op ut biljart ien d'n Terp, waor Gerrit al vest un neej carnavaalpak kreeg vur volgend jaor en waor zellufs ozze durpsraod vuzitter Karel Steeghs nog wat schon weurd richtte tot Gerrit en Els. En paar schon weurd han daornao ok os prinsepaar, zej hebbe ut goed gedaon en gej kost zien dat zej allebej alles gegève han, want mit un muuj gezicht en loëdzwaore biën, stokte ozze prins Math d'n urste vervolges de mök an. En dizze brandde zoëas de carnaval was: gewoën hardstikke goed.

En dan is ut aswoensdag, ut gebrukelukke verhaal. Opruume, naor de prins en prinses en lekker gezellig naopraote ovver carnaval 1998. Math en Wilma han wèr goed vur os gezurgd.

Nog bèter verzurgd wier ozze vuzitter, want den haaj nog en wasbeurt tegoed van de vrollie van de raod. Ien en alde zinken badkuup wier water gedaon, flink wat badschuum en daor ging ie dan. Lekker vertroeteld dur iederiën wier dat verkentje es flink gewasse. Saoves was dur wer ut askruuske hale ien de kerk en herring schelle ien dun Terp. En dan is ut echt vurbej en zeg ik gewoën: gej komt dit jaor toch ok mit carnaval, want zonne moje tied wilde zeker nie misse!